

SL(5)345 - Rheoliadau Trydan (Gorsafoedd Cynhyrchu Alltraeth) (Ceisiadau am Gydsyniad) (Cymru) 2019

Cefndir a Diben

Mae'r Rheoliadau hyn yn gwneud darpariaeth ynghylch rhoi cydsyniadau o dan adran 36 o Ddeddf Trydan 1989 ("Deddf 1989") i adeiladu, estyn neu weithredu gorsaf gynhyrchu alltraeth y mae Gweinidogion Cymru yn awdurdod priodol mewn cysylltiad â hi.

At ddibenion y Rheoliadau hyn, mae cyfeiriad at gais am gydsyniad o dan adran 36 o Ddeddf 1989 yn cynnwys unrhyw gais o dan adran 36A o'r Ddeddf honno am ddatganiad mewn perthynas â hawliau mordwyo cyhoeddus a wneir gyda chais am gydsyniad o dan adran 36 o Ddeddf 1989.

Gweinidogion Cymru yw'r awdurdod priodol mewn perthynas â cheisiadau a wneir ar ôl 1 Ebrill 2019 o dan adran 36 o Ddeddf 1989 sy'n ymwneud â gorsafoedd cynhyrchu (neu orsafoedd cynhyrchu arfaethedig) yn nyfroedd Cymru sydd â gallu cynhyrchu nad yw'n fwy na 350 megawat neu a fydd â gallu cynhyrchu nad yw'n fwy na 350 megawat.

Mae'r Rheoliadau hyn yn gwneud darpariaeth ynghylch:

- gwneud ceisiadau;
- gofynion cyflwyno a chyhoedduswydd;
- o dan ba amgylchiadau y mae ymchwiliadau cyhoeddus i'w cynnal; a
- cwmpas ymchwiliadau cyhoeddus pan fo un neu ragor o awdurdodau cynllunio perthnasol.

Mae'r Rheoliadau hyn hefyd yn gwneud darpariaeth ar gyfer yr amgylchiadau pan gaiff hysbysiad sy'n ofynnol gan y Rheoliadau hyn ei gyfuno â hysbysiad sy'n ofynnol gan neu o dan Atodlen 16 i Ddeddf Ynni 2004.

Maent hefyd yn gwneud diwygiad canlyniadol i Reoliadau Cadwraeth Cynefinoedd a Rhywogaethau 2017.

Gweithdrefn

Negyddol.

Materion technegol: craffu

Nodwyd un pwynt i gyflwyno adroddiad arno o dan Reol Sefydlog 21.2 mewn perthynas â'r offeryn hwn.

Rheol Sefydlog 21.2(v) - bod angen eglurhad pellach ynglŷn â'i ffurf neu ei ystyr am unrhyw reswm penodol

Mae rheoliad 7(1)(b) yn nodi bod yn rhaid cyhoeddi hysbysiad o gais "...mewn un neu ragor o bapurau newydd cenedlaethol". Fodd bynnag, wrth gyfeirio at bapur newydd cenedlaethol, nid yw'r Rheoliadau yn nodi a yw'r gair 'cenedlaethol' yn cyfeirio at Gymru neu at y Deyrnas Unedig.

Craffu ar y rhinweddau

Nodwyd un pwynt i gyflwyno adroddiad arno o dan Reol Sefydlog 21.2 mewn perthynas â'r offeryn hwn.



Rheol Sefydlog 21.3 (ii) - ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Cynulliad.

Mae rheoliad 5 yn darparu, pan fo ceisydd (rheoliad 5(2)) neu Weinidogion Cymru (rheoliad 5(4)) yn ystyried bod awdurdod cynllunio lleol yng Nghymru a Lloegr neu'r Adran Amgylchedd yng Ngogledd Iwerddon yn debygol o fod â buddiant yn y cais, rhaid i'r ceisydd gyflwyno hysbysiad am y cais i'r corff hwnnw (rheoliad 5 (2)), neu caiff Gweinidogion Cymru gyfarwyddo bod yn rhaid i'r ceisydd wneud hynny (rheoliad 5(4)). Nid yw'r darpariaethau hyn yn cynnwys cyfeiriadau at gyrff cyfatebol priodol yn yr Alban nac yn Ynys Manaw. Rydym ar ddeall mai'r rheswm dros beidio â chynnwys yr Alban yn y darpariaethau hyn yw'r pellter rhwng dyfroedd Cymru a'r Alban. Fodd bynnag, mae'r rhesymeg ynghylch pam nad yw Ynys Manaw wedi'i chynnwys yn y darpariaethau hyn yn aneglur.

Y goblygiadau yn sgil gadael yr Undeb Ewropeaidd

Ni nodwyd unrhyw bwyntiau i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

Ymateb y Llywodraeth

Craffu Technegol

Mae rhan o'r adroddiad sy'n ymdrin â chraffu technegol yn cyfeirio at un gwall drafftio. Mae'r adroddiad drafft yn nodi bod rheoliad 7(1)(b) yn darparu bod rhaid cyhoeddi cais amrywio... "mewn un neu ragor o bapurau newydd cenedlaethol". Nid yw'r Rheoliadau yn nodi a yw "cenedlaethol" yn cyfeirio at bapurau newydd cenedlaethol Cymru ynteu bapurau newydd y DU, fodd bynnag.

Dyma safbwynt y Llywodraeth.

Mae rheoliad 7(1)(b) o'r Rheoliadau yn darparu bod rhaid i'r ymgeisydd gyhoeddi hysbysiad am y cais amrywio "yn Lloyd's List ac mewn un neu ragor o bapurau newydd cenedlaethol". Gan fod Lloyd's List yn gyhoeddiad ar gyfer y DU mae'r cyfeiriad at "bapurau newydd cenedlaethol", yn ei gyd-destun, yn gyfeiriad at bapurau newydd y DU.

Mae'r Rheoliadau hefyd yn egluro y gallai cyrff y tu allan i Gymru fod â buddiant mewn cais amrywio (gweler rheoliad 5). Felly yng nghyd-destun y Rheoliadau cyfan, mae'r cyfeiriad at "bapurau newydd cenedlaethol" yn rheoliad 7(1)(b) yn gyfeiriad at bapurau newydd y DU.

O ganlyniad, nid ydym o'r farn fod angen diwygiad er mwyn ymdrin â'r pwynt craffu technegol.

Craffu ar Rinweddau

Mae'r rhan o'r adroddiad drafft sy'n ymdrin â chraffu ar rinweddau yn ymwneud â chyflwyno hysbysiad am y cais o dan reoliad 5. Nodir nad yw'r darpariaethau yn cynnwys cyfeiriad at gyrff cyfatebol priodol yn yr Alban nac Ynys Manaw ac nad yw'n eglur pam na chynhwyswyd Ynys Manaw yn y darpariaethau.

Fel yr eglurir ym mharagraff 4.5 o'r Memorandwm Esboniadol i'r Rheoliadau, bwriad y polisi yw gwneud darpariaeth sy'n cyfateb i'r hyn a geir yn Atodlen 8 i Ddeddf Trydan 1989 a Rheoliadau Trydan (Gorsafoedd Cynhyrchu Alltraeth) (Ceisiadau am Gydsyniad) 2006 ("Rheoliadau 2006"), ynghyd â mân ddiwygiadau er mwyn adlewyrchu rôl Gweinidogion Cymru fel yr awdurdod (cydsynio) priodol. Nid yw'r Rheoliadau yn cyflwyno polisi newydd na newidiadau i'r weithdrefn bresennol.



Mae rheoliad 5 o'r Rheoliadau yn gwneud darpariaeth gyfatebol i reoliad 6 o Reoliadau 2006. Nid yw'r cyrff a restrir yn rheoliad 6 o Reoliadau 2006 yn cynnwys corff ar Ynys Manaw. Mae rheoliad 5 o'r Rheoliadau yn gyson â rheoliad 6 o Reoliadau 2006 ac felly mae'n cyd-fynd â bwriad y polisi.

Trafodaeth y Pwyllgor

Trafododd y Pwyllgor yr offeryn, ynghyd ag ymateb y Llywodraeth, yn ei gyfarfod ar 18 Mawrth 2019 ac mae'n cyflwyno adroddiad i'r Cynulliad yn unol â'r pwyntiau adrodd uchod.

